

content, & auffi bien logé, que dans vn Louure; la porte feule me mettoit en peine, car ie defirois la pouuoir fermer quand ie fortirois, les Sauuages qui ne fe feruent que d'vne ecorce, ou d'vne peau pour fermer leurs cabanes, ne me sembloient pas affés bons charpêtiens pour fermer, mon palais; Mais Charles Meiachkaſat, me monſtra que ſi; il s'en va chercher deux bouts de planche, les cloïe par enſemble, fait vne petite porte: i'auois avec moy vn cademat pendu à vn petit ſac, il trouue l'inuention de s'en ſeruir pour fermer ma maïſon à clef: me voila donc logé comme vn petit Prince dans vn Palais, baſty en trois heures: comme ie craignois l'importunité des enfans, le Capitaine fait vn grand cry par les cabanes, & recommande à la ieuneſſe de ne point entrer en ma demeure, que par ma permiſſion: Jeuneſſe, diſoit-il, & [189] vous enfans, reſpectés noſtre Pere, allés le viſiter: mais quand il priera, ou qu'il fera empeſché, retirés vous ſans bruit, portés luy du poiſſon, quand vous en prendrés; les enfans me ſuiuoiſent par tout, & m'appelloient leur Pere; ils m'apportoient de leur peſche, & ie leur donnois vn peu de galette; en vn mot, i'eſtois en paix quand ie voulois, dans ma maïſon d'écorce; car ie pris la liberté dès le premier commencement, de renuoyer tous ceux que ie voudrois, quand i'auois quelque empeſchement: encor que ce ſoit choſe inouïe, qu'vn Sauuage reſuſe la porte de ſa cabane à vn autre Sauuage, perſonne neantmoins ne ſe formalifoit de la façon d'agir du Pere: Il faut dès voſtre premiere entrée donner le ply que vous deſirés à ces bonnes gens, capables de raiſon, & ils ne s'eſtonnent pas que nous ayons des façons de faire differentes des leurs.